

**TLHAGISO MABAPI LE KATLEGO MOTORS (PTY) LTD**

Lekalana la Phadisano e e Lolameng le Tshireletso ya Baji-bareki, (Competition & Consumer Authority, CCA) le tlhagisa sechaba mabapi le Katlego Motors, e e rekisang dikoloi tse di dirisitsweng di tswa kwa mafatsheng a sele. Madirelo a bofelo a a itsiweng a Katlego Motors ene ele Plot 6655 kwa Mogoditshane, mme jaanong ba fudugetse kwa lefelong le lesa. Mo khudugong eo go ya go direla go sele, Katlego Motors e na le ditaolo di le pedi tse e sa di diragatsang tsa Kgotla ya Phadisano le Baji-bareki (Competition & Consumer Tribunal), tsa gore e duele baji-bareki ba e neng e ba rekiseditse dikoloi tse di senyegileng. CCA e dumela gore Katlego Motors e tsweletse ka go rekisa dikoloi, mme baji-bareki bone ga ba itse mokgwa wa yone wa go dira dilo ka tshokamo mo kgwebong. Sechaba ka jalo se tlhagisiwa gore se nne podi matseba le go ela dilo tlhoko fa se dirisana le ba Katlego Motors.

Mo kgetseng ya ntlha, Kgotla ya Phadisano le Baji-bareki, ene e ntshitse taolo ya gore Katlego Motors kwa Mogoditshane e duele mongongoregi P37, 000 mabapi le go mo rekisetsa koloi e e senyegileng. Kgetse e ne ya rolelwa kgotla eo ke CCA, morago ga go dira ditlhotlhomiso tse di senotseng gore Katlego Motors e tsuulotse temana 15(1) ya Molao wa Tshireletso ya Baji-bareki, ka go dira kgwebo ka tshokamo, mabapi le go rekisa koloi e e senang boleng, e senyegile, mme e sa itsisa moji-moreki ka seemo sa koloi eo. Kgotla ya Phadisano le Baji-bareki e ne ya ntsha taolo, morago ga ba Katlego Motors ba palelwa ke go ikarabela mo nakong e e beilweng, gore moji-moreki a busediwe madi a gagwe a P37 000 mo malatsing a le masome a mabedi le bongwe. Katlego Motors ene ya ntsha P20 000 fela, mme mo go P17 000 yo o setseng, a sa duelwe, CCA ene ya dira kopo ya gore go gapiwe dithoto tsa Katlego Motors. E rile moragonyana Katlego Motors ya ntsha P11 000, mme go santse go na le sekoloto sa P6 000 go fitlha jaana.

Mo kgetseng ya bobedi, moji-moreki o ne a tshwanetse go busediwa madi a gagwe a a tshwarang, P33 000, a a neng a reka koloi ya Mazda 6, e e grey, mo go ba Katlego Motors. Koloi eo ene e tshwanetse go neelwa moji-moreki mo malatsing a le mane morago ga tuelo, mme ba Katlego Motors ba ne ba palelwa ke go dira jalo, mme mo boemong, ba neela moji-moreki koloi ya Mazda 6, e e botala ja loapi (blue), ebile e na le dilo dingwe tse di sa berekeng sentle. Morago ga seo, moji-moreki le Katlego Motors ba ne ba saenela tumalano ya gore Katlego Motors e tla rekisa koloi eo, mme e busetse moji-moreki madi a gagwe. Ba Katlego Motors ba ne ka boammaruri ba rekisa koloi eo, mme ba seka ba neela moji-moreki madi go ya ka ditumalano.

CCA e ne ya tlhotlhomisa kgang eo ka mabaka a gore ba Katlego Motors ba dirile kgwebo ka tshokamo, mabapi le go rekisa dithoto tse di senang boleng, di se mo seemong se se siameng, di senyegile, mme seo se le kgatlhanong le

**Competition & Consumer Authority**

Plot 28, Matsitama Road, Main Mall, Gaborone

Private Bag 00101, Gaborone, Botswana

T: +267 393 4278 | F: +267 312 1013

temana ya 15(1) ya Molao wa Tshireletso ya Bajji-bareki wa 2018.

Mo maitekong a go rarabolola kgang eo sentle ka kutlwisisano, moji-moreki le ba Katlego Motors, ba ne ba saenela tumalano ka fa tlase ga temane 34 ya Molao wa Tshireletso ya Bajji-bareki, e tsamaelana le Molawana wa botlhano wa Melawana ya Tshireletso ya Bajji-bareki ya 2019, (Consumer Protection Regulations 2019) gore Katlego Motors e busetse moji-moreki madi a gagwe mo nakong e e beilweng. Katlego Motors e ne ya dira dituelo di le pedi fela tsa madi a a tshwarang P9 900, mme ga sala sekoloto sa P23 100.

CCA ene ya re kwa morago ya isa kgang kwa Kgotleng ya Phadisano le Bajji-bareki, mme ba Katlego Motors ba ne ba laelwa go busetsa moji-moreki madi a gagwe ka bofefo, gone foo. Go tla go fitlha jaana, Katlego Motors ga e ise e diragatse taelo ya Kgotla, mme ka jalo CCA e dirile kopo mo lekgotleng gore go rekisiwe dithoto tsa Katlego Motors gore go duelwe moji-moreki madi a a setseng a P23 100.